

Gou Miz Sinhfwncwng Lo

Mwh cuengqgyaj, dou baenz ranz vunz bae youz. Yawjraen daxboh daxmeh baez cat sinhfwncwng couh ndaej riengjret niemhbiuq lo, naengh gauhdez le, gou couh naeuzhawj bohme h gou siengj banh sinhfwncwng. Daxboh daxmeh doq sangsad dapwngq lo.

Aen ndwen gonq, daxboh daiq gou daeuj daengz gungh' anhgiz banh sinhfwncwng. Youq ndaw dinghung, boux daxheiz ndeu riunyumnyum dakdaih dou. De ciepaueu bonj bouhugouj gou, youq gwnz dennauj fwngz seuqsedsed guhhong, loeghaeuj gij saenqsik gou, guh ndaej le doiq gou naeuz: "Siuj baengzyoux, mwngz bae ingjsiengq ndaej lo."

Sim gou diuqbubbub yamq haeuj aen ranzingjsiengq bae. "Siuj baengzyoux, naengh gizneix!" Cangh-

ingjsiengq vixvix aendaengq cungqgyang haenx, heuh gou naengh. Gou riengjret byaij bae, naengh youq gwnz daengq, yawjyawj aen gyaueujingq, youh vueng youh angq. "Gaej yaep da, it, ngeih, sam!" Cij dingqnyi "gaca" sing ndeu, cangh' ingjsiengq naenx roengz gvaimwnz. "Siuj baengzyoux, ndaej lo!" Dingqnyi cangh' ingjsiengq baenzneix naeuz, gou angq raixcaix, hozngeiz: Dozsiengq ingj ndaej lo, mbatneix ndaej aeu sinhfwncwng loba!

Laihnaeuz ndaej sikhaek lingxaeu sinhfwncwng lo, byawz rox, daxboh youh daiq gou bae loeg luzfwngz. Gou geizheih cam: "Gwnz sinhfwncwng mbouj dwg miz dozsiengq gou ha, vihmaz lij yaekaeu loeg luzfwngz ne?" Daxboh naeuz: "Loeg luzfwngz dwg demgya caengz an' onj

baujcam he, fuengzre sinhfwncwng ngaiz vunz caeg yungh." Laxlawz yienghneix, gou fwt roxyiuj ngaekngaek gyaueuj.

Aen ndwen ndeu gvaqbae lo, gou ngoenzneix cingqcaen lingx ndaej sinhfwncwng lo. Gou sijsaeq ngonzyawj sinhfwncwng, gwnz sinhfwncwng gou naj riunyumnyum, gagsaenq rimmwdmwd. Gou loqsiengj hwnjdaeuj: Miz sinhfwncwng le, gou bae youz, yawjngonz bozvuzgvani couh fuengbienh lai lo; gou lij ndaej aeu sinhfwncwng, bae ngaenzhangz dawz gij cienznyokmaj gou rom hwnjdaeuj ne!

Daxboh raen gij yienghceij angqvauvau gou, naeuz: "Miz sinhfwncwng le, couh dwg naeuz mwngz ndaej engqgya fuengbienh

vaiqvet yiengjsouh gak cungj gunghgung fuzvu guekgya daezhawj haenx, doengzseiz hix yaekaeu rapdawz gij cwzyin caeuq yivu doxdaengj de. Youq guekgya bungqdaengz hojnanz caeuq yungyiengj seiz, dou wnggai cizgiz yiengjwngq hauqcau, vih gij onjdingh, fazcanj caeuq hoenghvuengh guekgya soengqhawj ligliengh. Mwngz aeu dawz ndei sinhfwncwng, engq aeu guh boux gunghminz ndiepgyaez guekcoj, vwnzmingz soujgij ndeu." Dingq gij vah daxboh le, gou roxnyinh mbaw sinhfwncwng ndaw fwngz naeknumnum—Neix mboujdan dwg mbaw gaj ndeu, engq dwg faenh cwzyin caeuq dangrap ndeu ha!

(Cinz Couhyenj raiz Yinj Fuzgen hoiz)

Fan Moeg Raeujrubrub



Ngoenzneix gou gangj aen goj neix, dwg aen goj raeujrub fatseng youq seizdoeng.

Seizdoeng ngoenz ndeu banringzgvaq, gyoengq doengzhag cungj lij lumj duznaen iq ndang rengz sawj mbouj liux nei, couh suenq ninz roengz lo, hix laeuh ok gij manzgyaengq daeuj. Yawj, seizneix gij fwngz iq gyoengqde laeglemx daj ndaw moeg iet okdaeuj, seizhaenx gij din iq dik moeg okbae, mizseiz baez fan ndang, daengx aen ndang couh rengx rumznit liux.....

Ngoenzde, Veiz lauxsae guenj dou ninzringz. Gou laep da dwk, dinghdingh ninz youq gwnz congz, baez fan ndang, yawjraen Veiz lauxsae ngaem gyaueuj gaij cozyez, mbouj seiz ngiengx gyaueuj cazyawj dou. Aen cung ndaw gyausiz yiengj digdaeg mbouj geij nanz, couh cienz ok gij sing miz gvilwd gyoengq doengzhag diemheiq lo.

Seizneix, Veiz lauxsae ndwn hwnjdaeuj, sohsoh byaij gvaqdaeuj coh gou. Gou laihnaeuz de raen gou mbouj caengz ninz ndaek, lienzmuengz veq naj. Siengj mbouj

daengz, de byaij gvaq henz ndang gou, bang boux doengzhag henz gou hoemq moeg, liux le youh cienq ndang byaij daengz henz congz boux doengzhag wnq, menhmenh gaem din moeg, siujsim sisi mbe hawj moeg bingz, gij dungcoz de mbaeumbwt lumjbaenz mbouj miz saek di sing. Lwgda de cim

faj din loh ok ndaw moeg daeuj haenx, de loq gungj hwet, dawz faj din haenx menhmenh soengq dauq ndaw moeg bae. Seizhaenx, gou roxnyinh Veiz lauxsae couh lumj geu ndit ndeu, ciuq rongh gyausiz liux.

"Dawz gij fwngz haeuj ndaw moeg bae, baenz yienghneix couh

raeuj lo." Seizneix, Veiz lauxsae byaij daengz henz ndang gou, gaem gij fwngz gou, unqswnh soengq haeuj ndaw moeg bae. Gij dungcoz de mbaeumbwt baenz maz, lumjbaenz lau vaih gij loq gyaundeih gou. Riengzlaeng, de youh saeqsim nengh moeg hawj gou, saedbauj rumznit mbouj ndonj ndaej haeuj laj moeg bae. Seizhaenx, gou roxnyinh Veiz lauxsae lumj daxmeh gou ityiengh gyaec gou. Faenh gyaec neix couh lumj raq heiqraeuj ndeu, daj gyangfwngz gou menhmenh cienz daengz daengx ndang, hawj gou roxnyinh daengz gij raeuj gaxgonq mbouj miz gvaq neix.

Ngoenzde, gou ninz youq laj moeg raeujrubrub, ninz diemzsubsub loq fangzhwnz. Gou ngeix, gijneix mboujgag dwg fan moeg raeujrubrub ndeu, fan moeg cang rim gyaec ndeu, lij dwg gij cingz lauxsae caeuq hagseng ciuhvunz nanz lumz ndeu. Gij cingz neix baet beuj liux seiznithaengq, lij lumjbaenz raemx iq seizcin nyinh raeuj ndang raeuz.

(Dungz Gaijcwngz raiz Veiz Yen' gyangz hoiz)

Gou Hag Rox Saeg Giuzhaiz Lo

Byai singhgiz, lauxsae anbaiz dou ma ranz guh cungj cozyez ndeu—guh hongranz. Gou laeglemx hot ndaet gaemxgienz: Bingzseiz daxmeh cungj naeuz gou ndaej ungjcungh lai, baez neix gou itdingh aeu guh ndei yiengh hongranz ndeu, hawj daxmeh roxdaengz, gou mbouj caiq dwg boux lwgnyez "rox gwn mbouj rox guh" ndeu!

Guh gijmaz hongranz cij baenz ne? Singhgiz roek haetromh, gou youq ndaw ranz byaij guhcaemz. Daeuj daengz yangzdaiz, gou yawjraen doiq giuzhaiz singhgiz gaxgonq dwkgiuz sat swnhfwngz cuengq youq gizgox haenx, ndaw sim miz cawjeiq lo. "Gou couh saeg giuzhaiz ba!" Gangj le, gou vaxdawz giuzhaiz, doq cung bae

funghdajswiq.

Singhgiz gonq mwh dwkgiuz doek di fwn he, haiz cungj nem naez rim bae. Yawj doiq giuzhaiz uqatat neix, gou saekseiz mbouj rox baenzlawz bae saeg de. Siengj daengz daxmeh baeznaengz saeg buhvaq, cungj dawz buhvaq cuengq youq ndaw bat cimq raemx yaep ndeu, saeg giuzhaiz hix yaek cimq yaep ndeu ha? Gou hainduj ngeix: Doiq giuzhaiz neix uq naez lai, danghnaeuz cimq de youq ndaw bat, raemx ndaw bat haengjdingh uq liux bae, wngdang baenzlawz guh ne? Gou fwt singjsag gvaqdaeuj, giuzhaiz couh lumj aen doxgaiq dajcoux ndeu, gou raix raemx haeuj ndaw haiz bae caemh baenz ho! Siengj daengz couh guh, gou sikhaek aeu bat daeuj, raix di

genjsaegbuh caeuq raemx coq ndaw bat, ndau yinz le, siujsim sisi aeu gij raemx gyaux ndei haenx raix roengz ndaw haiz bae. Raemx menhmenh iemq ok najhaiz, nyumx doengh gij diemjraiz uq gwnz haiz baenz saekhenjndaem.

Gvaq yaep ndeu, gou gag gujsuenq, wnggai ndaej cat haiz lo. Gou yot demhhaiz okdaeuj gonq, yungh fagcat catcat geij baez, sikhaek cat ok le baenz dong fugfauz iq saekmong, riengzlaeng aeu raemx cungdongj, gaiq demhhaiz haxbaenh lij uqatat haenx doq bienq ndaej yienghsiengq moqsak lo. Couh yienghneix, ndaw haiz rog haiz gou cungj cat dwk seuqsatsat bae. Gou dawz doiq giuzhaiz saeg seuq haenx langh youq gwnz yangzdaiz giz ndit cei q haenq, angqfwngfwng dwk siengj: Daxmeh yawjraen doiq giuzhaiz gou saeg ndaej seuqsatsat neix, itdingh

haenh gou.

Banringz, gou daeuj daengz yangzdaiz, yawjraen najhaiz saekhau bu rim le diemjraiz henj. "Gou mingzmingz saeg giuzhaiz seuq lo, vihmaz lij miz doengh gij diemjraiz yakyawj neix?" Gou simgip hemq hwnjdaeuj. Dingqnyi sing' yaem gou, daxmeh byaij gvaqdaeuj, riu naeuz: "Langh haizhau, danghnaeuz duk caengz ceijgaen ndeu, haiz hawq le couh bienq hau haujlai." Daxmeh doq gangj, doq aeu baengzuet daeuj uet haiz, doeklaeng yot ok ceijgaen, duk giuzhaiz hwnjdaeuj.

Banhaemh, giuzhaiz langh hawq, dawz ceijgaen deuz, diemjraiz caen bienq myox dahraix, giuzhaiz cix hau lumj haizmoq nei. Saeg haiz lij miz cungj banhfaep ndei neix, caen dwg gvaq saedceij seiqlengq ndaej hawj vunz hag gvai!

(Cangh Cinyui raiz Lij Siulingz hoiz)